

Gjaldskrá þessi, sem samin er og samþykkt af stjórn Hitaveitu Egilsstaðahrepps og Fella og sett er samkvæmt orkulögum nr. 58, 29. apríl 1967, staðfestist hér með til þess að öðlast gildi 1. nóvember 1986, og birtist til eftirbreytni öllum sem hlut eiga að máli. Jafnframt er úr gildi felld eldri gjaldskrá sama efnis nr. 198, 8. apríl 1986.

Iðnaðarráðuneytið, 17. október 1986.

Albert Guðmundsson.

Guðrún Skáladóttir.

REGLUGERÐ

um söluskatt af bátum.

1. gr.

Bátar sem eru 6 metrar að lengd eða stærri skulu undanþegnir söluskatti, enda beri bygging þeirra, fyrirkomulag og útbúnaður með sér að þeir séu byggðir til nota í atvinnuskyni og uppfylli skilyrði Siglingamálastofnunar ríkisins um slíka skráningu.

Af skemmtibátum skal ætíð greiða söluskatt.

2. gr.

Við tollafgreiðslu á innfluttum bátum skal leggja fram staðfestingu frá Siglingamálastofnun ríkisins um stærð og gerð bátanna.

Af innfluttum bátum skal innheimta söluskatt að fullu við tollafgreiðslu þeirra.

Af bátum sem fluttir eru inn til endursölu og bátum sem framleiddir eru hér á landi skal söluskattur innheimtur að fullu við sölu bátanna.

Fella skal þó niður söluskatt við tollafgreiðslu og/eða sölu báta ef ekki er neinn vafi á að bátarnir séu undanþegnir söluskatti samkvæmt ákvæðum 1. gr.

Leiki vafi á því hvort bátur sé ætlaður til nota í atvinnuskyni ber að innheimta söluskatt af honum skv. 2. og 3. mgr. þessarar greinar. Söluskattur í slíkum tilvikum verður þó endurgreiddur ef sannað þykir að báturinn sé notaður sem atvinnutæki, sbr. 4. gr.

3. gr.

Söluskattur er einnig endurgreiddur af lífbátum sem viðurkenndir eru af Siglingamálastofnun ríkisins og settir eru í skip sem falla undir ákvæði 14. tl. 13. gr. reglugerðar nr. 486/1982 um söluskatt með síðari breytingum, sbr. reglugerð um endurgreiðslu tolla vegna skipamála og skipaviðgerða.

4. gr.

Endurgreiðslur skv. 2. gr. og 3. gr. koma aðeins til greina vegna báta sem notaðir eru í atvinnuskyni, enda uppfylli viðkomandi bátar í alla staði ákvæði reglna um smíði og búnað báta til að verða skráðir sem vinnubátar.

Áður en endurgreiðsla fer fram ber eiganda báts að sanna með staðfestu skattframtali að 50% nettótækna á næstliðnu ári séu til komnar vegna reksturs bátsins, þó minnst 180 000 kr. Fjárhæð þessi er miðuð við framfærsluvísitölu þann 1. september 1986 og breytist til hækkunar eða lækkunar í samræmi við breytingu á henni.

Réttur til endurgreiðslu söluskatts samkvæmt þessum reglum fellur niður að tveimur árum liðnum frá innflutningi eða kaupum viðkomandi báts.

5. gr.

Umsóknir um endurgreiðslu söluskatts samkvæmt þessum reglum skulu bornar fram á sérstökum eyðublöðum sem Siglingamálastofnun ríkisins lætur í té.

Endurgreiðsla kemur því aðeins til greina að allar upplýsingar sem eyðublöðin gefa tilefni til séu skilmerkilega færðar og þau jafnframt undirrituð.

Umsóknir um endurgreiðslur skulu sendar Siglingamálastofnun ríkisins.

6. gr.

Komi í ljós að aðili sem notið hefur niðurfellingar eða fengið endurgreiðslu söluskatts samkvæmt reglum þessum hafi gefið rangar eða villandi upplýsingar, sbr. 4. gr., eða breytt afnotum sínum að bátum þannig að reglur þessar eigi ekki við mun ráðuneytið endurkrefja viðkomandi um vangoldinn söluskatt ásamt viðurlögum.

7. gr.

Reglugerð þessi er sett samkvæmt heimild í 6. gr. laga nr. 10/1960 um söluskatt með síðari breytingum og öðlast gildi hinn 1. nóvember 1986.

Fjármálaráðuneytið, 17. október 1986.

Þorsteinn Pálsson.

Lárus Ögmundsson.

REGLUGERÐ

um breyting á reglugerð nr. 486/1982 um söluskatt, með síðari breytingum.

1. gr.

6. mgr. 1. tl. 14. gr. reglugerðarinnar orðist svo:

Þrátt fyrir ákvæði 2.—5. mgr. þessa töluliðar skal aðilum, sem framleiða í verksmiðjum íbúðarhús, svo og hús fyrir barnaheimili, leikskóla, félags- og safnaðarheimili og atvinnurekstur, heimilt að draga við söluskattsskil eftirtalda hundraðshluta frá heildarsöluverði uppsettra húsa áður en söluskattur er reiknaður:

- | | |
|--|-----|
| a) Sé verksmiðjuframleitt hús afhent tilbúið undir málningu og innréttingu með eða án allra lagna | 44% |
| b) Sé verksmiðjuframleitt hús afhent fokelt, óháð því hvort útveggir eru tilbúnir undir málningu eða þak frágengið að utan | 42% |

2. gr.

Reglugerð þessi öðlast þegar gildi.

Fjármálaráðuneytið, 17. október 1986.

Þorsteinn Pálsson.

Lárus Ögmundsson.